

Aruba su fundacionnan ta brinda comunidad hopi trabou gratis

ORANJESTAD - Aruba su fundacionnan ta brinda nos comunidad cu varios servicio y ayudo cual hopi bes ta wordo duna gratis, Mandy Lacle cu ta custumia na haci trabou boluntario a bisa.

Actualmente, e fundacion Mary Joan ta buscando boluntarionan. Aunke Lacle no ta haci trabou boluntario pa e fundacion aki en particular, e ta conseha hende pa haci trabou boluntario si. E ta comenta "Como persona cu ta boluntario y ta mira tur e trabounan cu nan ta haci mi por bisa cu e fundacionnan dedica na yuda otro hopi bi-aha mester persona pa yuda nan tambe. E por ta pa e.o. colecta donacion, duna un man na un evento etc. Nos nunca no sa ki dia nos mes o nos famia mester ayudo di e mesun fundacionnan aki pa esey e ta importante pa pone tempo un banda y yuda esunnan cu ta haci asina hopi den nos comunidad."

Mary Joan Foundation

Dia 24 di Juni 2015, na Fantastic Gardens, di 7:00 pa 8:30 PM nos ta warda esunnan cu ta interesa pa conoce fundacion Mary Joan (MJF) mas di cerca y lo ta desea pa inscribi pa bira boluntario. Fundacion Mary Joan ta un organisacion cu ta conta riba e tempo y cooperacion cu ta wordo duna door di boluntario. Trabou boluntario tabata y ta pa MJF e forsa di mas grandi for di cuminsamento te cu dia di awe.

Trabou boluntario ta trabou cu bo ta haci den bo orario liber pa otronan of pa e comunidad sin cu bo ta wordo paga pa eherce e trabou aki. Trabou boluntario ta liber pero cu obligacionnan cu mester mantene na dje, specialmente ora di traha den grupo pa un meta.

Cada hende tin diferente habilidad y lo fit den un proyecto/actividad miho cu otro.

Actualmente 95% di MJF ta draai rond di trahadonan boluntario cu ta traha pa sigui brinda e clientenan e sosten y guia cu nan merece durante y despues di un trayectoria dificil y pa sigui hiba e fundacion pa dilanti. Pa es motibo MJF su trabounan boluntario ta di suma importancia y sin esaki e fundacion no por keda existi. P'esey ta importante pa keda traha ariba loka ta e fundeshi di e

fundacion aki esta Trabounan Boluntario di y pa tur cu ta wordo confronta cu cancer na pecho.

Pa tur hende

Tur hende cu ta dispuesto pa duna nan tempo pa un bon causa. Persona cu kisas ta pensionado pero cu tin e curason pa extende un man, un juffrouw di scol, un persona cu conocemento di salud, un persona cu kier yuda organisa actividadnan pa pashent y sobreviviente, persona

cu por yuda cu mantencion di centro of un persona cu otro specialidad cu por complementa e trayectoria di e clientenan. Personanan bou 16 aña kisas por bira un poco dificil, pero no ta imposibel. Atende e anochi di informacion di MJF, diaranson 24 di juni 2015. Na Fantastic Gardens, situa na Bushiri. Bin conoce MJF mas di cerca y inscribi pa bira boluntario. MJF ta ocupa su tareanan pa conscientisa como tambe pa duna sosten na clientenan. □

